



Velferðarnefnd
Nefndarsviði Alþingis
Austurstræti 8-10
101 Reykjavík

Seltjarnarnesi, 10. desember 2018

Erindi: Umsögn Lyfjafræðingafélags Íslands (LFÍ) um tillögu til þingsályktunar um notkun og ræktun lyfjahamps.

Lyfjafræðingafélag Íslands (LFÍ) sendir eftirfarandi umsögn um tillögu til þingsályktunar um notkun og ræktun lyfjahamps (149. löggjafarþing 2018-2019, þingskjal 49 – 49. mál).

Lyfjafræðingafélag Íslands (LFÍ) leggst gegn því að umrædd þingsályktunartillaga verði samþykkt eins og hún er lögð fram.

Aftur á móti vill LFÍ koma eftirfarandi atriðum á framfæri:

1. Umræða í þjóðfélaginu er of skammt á veg komin til þess að Alþingi geti gengið fram fyrir skjöldu og leyft cannabis-efni með þeim hætti sem lagt er til. Lýðheilsusjónarmið ráða þar mestu. Þess má geta að öll framleiðsla, t.d. matvæla, meðferð eiturefna, varsla og sala áfengis og öll umsýsla efna sem hafa verkun á mannlíkamann með einhverjum hætti, eru háð ströngu eftirliti og leyfum. Þó svo að það væri einnig ætlunin samkvæmt tillögunni, breytti það ekki meginafstöðu LFÍ. Umræðan hefur ekki farið nægilega fram meðal fagaðila og almennings.
2. Orðið „lyfjahampur“ stingur í augu, þar sem forskeytið lyfja- eða viðhengið –lyf (t.d. lyfjahampur, náttúrulyf) gefur jafnan til kynna að um sé að ræða efni/lyfjaefni sem hefur eiginleika lyfs, eins og lyf er skilgreint í lyfjalögum. Nú má halda því til haga að efni í hampi (kannabínól/kannabídíól) hafa lyfjafræðilega og læknisfræðilega verkun. Verkun sem sannreynd er með framleiðslu lyfja og klínískum rannsóknum í kjölfarið. Sé ætlunin með þingsályktunartillögunni að öll ræktun, framleiðsla, varsla, ávísun, dreifing og sala fari fram innan þess reglu- og eftirlitsverks sem þegar er í gildi við framleiðslu, dreifingu og lyfja, þá kann að gilda öðru máli um stuðning við tillögu af þessu tagi. Slíkt verklag er þegar fyrir hendi. Jafnframt má benda á að á markaði er á Íslandi lyfið Sativex, sem inniheldur kannabínól/kannabídíól og er með ábendingu (notkunarvið) fyrir sjúklinga með MS-sjúkdóm.

3. Í greinargerð með þingsályktunartillögunni er getið um refsingar. LFÍ bendir á að rök mæla með því að taka beri vörslu neysluskammta út úr refsiramma. Þessi tillaga getur um refsirammann, en tekur ekki sérstaklega á honum. Þá eru sjúklingar aðallega hafðir í huga.
4. LFÍ talar jafnan máli sjúklinga. LFÍ væri því ekki andsnúið ef yfirvöld settu einhvern ramma um notkun cannabis-efna í lækningaskyni, en þá innan heilbrigðiskerfisins og í samvinnu við heilbrigðisstarfsmenn, enda um málefni sjúklinga að ræða.

Að lokum vill LFÍ áréttta þá skoðun sína að þingsályktunartillaga er ótímabær og verður ótímabær eins og hún er lögð fram, nema að undangenginni umræðu á lýðheilsufræðilegum forsendum.

Virðingarfyllst,



Lóa María Magnúsdóttir
Formaður Lyfjafraeðingafélags Íslands